

L Comun general resta. Vardon de l fèr jir delvers

La regoeta de firmes per l referendum contra l Comun general, endrezèda da la Lega Nord e sostegnuda da la Associazione Fassa, se à fermà a 823 contra les 1500 che ge aessa volù

Politica - L referendum per tor jù l Comun general no vegnarà metù a jir. Chest l'é l fat segur oramai da na setemèna, anunzià ofizialmènt dai promotores de la Lega Nord e de la Associazione Fassa apontin en vender passà te na conferenza stampa a Trent.

Les é states 823 la firmes toutes sù: massa peces per meter en pe te dut l Trentin l'aparar referendarie per tor jù l'ent de noscia val, ma tel medemo temp segur n bon numer, sun chel che ades la istituzions, i movimenc e la sociazions de Fascia cogn se fèr n pensier.

La critica, envers l Comun general e envers duta la istituzions, la é stata e la é belebon forta, e enceben che se sapie che dut chest l'en pèrt frut de n malcontent più gran, de na desafezion generèla per la politica, e ence de ignoranza e de informazion strumentalisèdes a truz, chesta critica no se pel no la conscidrer, alincontra ge vel vardèr de la entener delvers e de troèr respostes aldò.

L Comun general l'é na istituzion fundamentala per la comunanza de Fascia e per duc i ladins, l'é zeche de n muie più emportant che demò n consorzie de servijes, l'é na istituzion ritadina de la longia storia e tradizion de autonomia che noscia val à semper abù e rencurà ti secoi: chest i l'à dit e rebadi te chest ultim temp aministradores e esponenc di movimenc politiches e culturai ladins. La stragran maoranza de fascegn à confermà de no voler renunzièr a chesta istituzion, ampò

fossa de ütöl entener la rejons reèles di passa 800 fascegn che à firmà, fossa de ütöl saer cotenc de chi fascegn (touc fora chi de la Lega o che il l'fat per rejons "ideologiches") i à pissà e capì dassen chel che i fajea e co che i aessa volù jir inant te noscia val e te noscia comunanza se fossa stat dalbon tout jù l Comun general.

Rejons, proponetes e obietives concrec da fundament, aldèl de slogan desche "baraccone inutile" e del fat de cogner se chierir visibilità desche "forzes de oposizion", no se n'atenen nience dai promotores. Se pel entener alincontra sia frustrazion per no aer arjont l zil sperà, ma no la polemiches, la ofenudes, la cuses de intimidazion fausses e zenza fundament.

Chi che te Fascia à volù promuover la regoeta de sotescrizions i à podù l fèr zenza vegnir manacé ne "intimidii" da nesciugn. Sia posizions à troà lèrga sun duc i media (ence su La Usc, chechemai die zachei, l'é stat publicà la letres de Guglielmi, Pitscheider e Lazzer). E se, apede ai gazebi olache zachei domaneà de firmèr, de etres dajea fora volantins che dijea de no firmèr, chesta l'era "contrainformazion" democratica, no de segur "intimidazion". Adertura en cont del volantìn de l'Union di Ladins, che envièa duc i fascegn a defener l Comun general, e l tolea cà n veie slogan storich con la paroles "No saron mia tant dejodesc e ciordogn



La senta di Comun general.

[trad. da dizionar Mazzel: disordinati e indolenti] da renunzièr a noscia autonomia e noscia identità?" zachei de l'Associazione Fassa à scrit che chel volantìn ge dajea de le "merdacce" (sic!) a chi che à firmà.

Aldèl de la polemiches dejutoles, l soul fat segur e concret l'é che, per grazia, l Comun general no l risia de vegnir tout jù dai trentins col referendum, l resta. E chesta de segur no l'é na venta demò per la Procuradora Donei e l President Bernard, o demò per la UAL e l'Union di Ladins. L'é na venta per duc i fascegn, se duc ensema ades vardaron de lurèr per sostegnir e engaisser l Comun general, per l critichèr ence, ma semper con chela de l fèr doventèr più fort, no più debil.

Lucia Gross

Comentar

I fascegn à desmostrà de esser jent responsàbola

A la dir duta, Fascia l'aea jà desidù de no sostegnir nesciun referendum del 2010, canche a litèr per l Comun general l'era jit passa l'80% di litadores. La Lega almoto chest no l'aea entenù e l'aea volù slarièr fora sia domana a na val n muie identità e caraterisèda da n fort sens de partegnuda e de responsabilità.

Sostegnir che 1500 firmes l'é massa per la val de Fascia l'é na vértola, na giustificazion che no stès en pe, ajache canche i besegnes é reèi chel ostacol se desfanta. A metà di egn Setanta l'Union di Ladins fajea pontèr via na gran regoeta de firmes per na lege de scomenzadiva populèra outa al riconosciment de la mendranza ladina te la Provinzia de Trent. I fossa stac de do-treimile a firmèr e prest se à passà via la mile sotscrizions che servia per ruèr a la lege n. 19 del 1976.

L'obiezion che per l Comun general de Fascia à lità l'80% percheche l'era da jir te n'outa demò a litèr ence per i ombolc, l'aea amò manco fundament. Chel l'é stat n moment de gran serietà politica, che da subito l'aea metù sul medemo pian comuns e comunità: chi che cernea na candidatura renunzièa a l'autra. I fascegn à desmostrà de esser jent responsàbola, che sia autonomia i vel se la vadagnèr. Chesta regoeta de firmes l'é stat demò na conferma.

No sé se dalbon la Lega Nord cherdea che na val con na identità scì forta ge aessa dat te man a dut l Trentin l met de dezider sul davegnir del Comun general. Se la l cherdea l'aea proprio falà de pien. Se enzeve la l'aea fat per coerenza e perché forza de oposizion, chest va ben, percheche na val madura é fata de persones che no à tema del confront, che no à poua de n sofie de vent o de na broa.

A la fin l confront l'é stat, i promotores del referendum é stac metui te la condizions de informèr la jent de Fascia de sia rejons ence travers i mass media, enceben che de n muie i lo conscidrasa falà. Ma la responsabilità de noscia jent à desmostrà che l'avertura al confront e la forza de la rejons miores l'é l

remedie ver contra la cernudes falèdes, percheche con l mèl voler e la mencianza de desponibilità se crea demò rotures, se leva permèi e se semena descordies. Chest vel dir vèlch ence per i profec de desgrazia e per duc chi che se à lascià fèr ju da la desfidenza.

Che la lezion ge serve a la Lega per entener che chi che l'autonomia i se l'aea suèda e ades i la vel empienir de segnificat no i va provoché e che la ge serve ence a chi opera per l ben de noscia val, percheche 823 jent che no se recognosc amò te chest ent e les à volù l fèr a saer, no les é peces.

Chest l'é l temp de se tor sù responsabilitèdes pissan a anché e al davegnir e l Comun general de Fascia l'é soradut na cernuda de responsabilità. L'é n empegn per i ombolc a creer fin junsom che da chiò passarà la cernudes fundamentèles, l'é n empegn per nos sentadins a renforzèr la trama de na comunità tegnicia, con na identità forta che vel jir inant adum.

N detelpai donca a la jent de Fascia percheche l'aea desmostrà che l ciaval l'é san e no l se lascia ne encantèr ne meter l brenel.

L'auter segnèl, apede a chel intern, l'é per la Comunità Trentina, percheche no la se lasce sciampèr l'ocasion de chesta reforma. Perché pa lascèr sù n percors de autogoern tanche scomenzà? Perché pa ge jir dō a la logica populista del carozon enzeve che se empegnèr per fèr sù dalbon vèlch de inovatif? L sarà da miorèr, emben vardon de l miorèr, percheche l'aea feni l temp di ciampanii e l'é ora de durèr l spazie de la colaborazion e de l'unità de intendimenc e de vijions.

L'autonomia va meritèda e stravardèda con cernudes responsàboles, con la capacità de lejer e antizipèr l davegnir. Con fadia e empegn te Fascia aon metù pegn su l'autogoern, no per se endotèr de n ent en più, ma percheche cherdon che, per l ben de duc, serve dutes ensema la forzes miores de noscia comunità.

Silvano Ploner, president de l'Union di Ladins de Fascia

Nef luster "sostenibol" per l refuge Boè

Provinzia e Sat ensema per la restruturazion e l smaorament del storich frabricat sun Pordoi aldò di più neves criteries de l'edilizia sostenibola

L'é stat aproà enstadì da la Jonta provinzièla, su proposta de l'assessor ai lurieres publics, ambient e trasporc Alberto Pacher, n protocol de cordanza anter Provinzia autonoma de Trent e Sat - Sozietà di alpinisè tridentins - su l'edilizia sostenibola sa mont. Se trata de n projet che revèrda i refuges da mont che pontarà via da la restruturazion e l smaorament del refuge Boè, logà sul Sas Pordoi a 2873 m., te n raion de gran prestije naturalistich. En conscidrazion de l'emportanza de l'opera ge é stat dat sù, ai fins de la projetazion integrèda, na consulenza specifica a la sozietà Habitech - Distret tecnologich trentin.

L'intervent pervedù al refuge Boè tegnarà cont da na man de la problematiches del paesaje e da l'autra se cruziarà de realisèr na struttura che dal pont de veduda climatich posse aer carateristiches più vejìn possibol ai prinzipies del sparagn energetich. La sozietà se cruziarà de ge enjignèr a la Sat la formazion relativa a la metodologia de la projetazion integrèda e sui criteries de calità che cogn aer i

frabricac de legn su la basa de la certificazion Arca (ARchitettura Comfort Ambiente), n studie aldò che revèrda n projet ejemplèr de restruturazion de n refuge da mont en quota, tel segn de la sostenibilità, e la definizion de linia guides aldò per la realizazion de l'intervent.

N moment n muie emportant de la projetazion integrèda l'é la "charrette", na riunione che perveit che tole pèrt duc i desvalives operadores e che la podarà vegnir chiamèda ite più che na outa.

"L Boè, logà tel maraveous paesaje del Sela - deschiarese l'assessor Pacher - l'é un di refuges storics del Trentin, fat sù del 1898 e l'é stat ence un di prumes a esser oget de intervenc de recalificazion ambientèla, con la realizazion, del 1992, de n impiant sperimentèl per l tratament e la

depurazion biologica de la èghes pazes. Con chesta neva restruturazion e l smaorament che serf, jiron a valorisèr amò de più na realtà che raprejeta n pont de referiment emportant per duc chi che à a cher i crepes e, de gra a Habitech, l faron metan a frut la cognoschenzes più neves tel ciamp de l'edilizia sostenibola."



L refuge Boè (www.skiforum.it)